

Gafur Mirzo (Uzbekio)



LA VIVO

Kion signifas la Vivo
 por la Homo sur Tero?
 Por kiu Ĝi estas ĝuo,
 kaj por kiu sufero!
 Kaj por kiu Vivo estas
 nur sensenca amuzo
 Kaj alia iu eble
 uzas Ĝin por la ruzo!
 Kiu dum la tuta Vivo
 senĉese ridas, ĝojas
 Tamen sur alies vojo
 hundaro ĉiam bojas!
 Kaj por kiu ĉiam ĉie
 ĉio nur pure veras
 Sed alia pro l' malvero
 senfine tuttoleras!
 Por kiu la Vivo estas
 pura kaj plena puto
 Kiu ĉiam bezonegas
 je eta akva guto.
 Por kiu la Vivo estas
 vojo glata kaj rekta
 Sed Ĝi por aliu estas
 nur la pado neglekta.
 Multaj Homoj uzas Ĝin nur
 por trinki kaj manĝi
 Sed Ĝin uzas noblaj Homoj
 por la Mondon aranĝi.
 Kaj la Vivo por la kelkaj
 amuza ludo ŝajnas
 Kiu en la ludo ĉiam
 malbonŝancas, malgajnas.

Por kiu Ĝi estas Ĝarden'
 belega, buntkolora,
 Por aliul' estas Revo
 ne atingebla, fora.
 Al kiu en Vivo ĉiam
 kunvojaĝas la Amo
 Tiu kantas dum la Vivo
 nur en la gaja gamo!
 Por la multaj Vivo estas
 nur postkuri la monon
 Por ŝaĝuloj — ŝanc' por fari
 al la Homaro Bonon!
 Se Vi sentas Vin la Homo
 en ĉi komuna Domo
 Penu ĉiam vivi en Viv'
 kiel la Vera Homo!
 Dume Vi estas vivanta
 ne forgesu Homdecon!
 Aprezu en vivo VIVOn,
 Pacon kaj Amikecon!
 Ne perdu Vi vane Vivon,
 ĉiam havu Homdignon!
 VIVO ja estas por lasi
 ion bonan postsignon!
 De l' poeto pri la Vivo
 estas dedukto — JENO:
 VIVO por la sekva Mondo
 estas la EKZAMENO!

la 15-an de aŭgusto, 2020

Taŝkento, UZBEKIO



Hans-Georg Kaiser (Germanio)



Mi volas esti via papilio

Mi volas esti via papilio,
lasu min danci sur vi.
Ho, amato, karulo,
lasu min danci sur
via alloga korpo.
Lasu min flirti ĉe vi,
ĉe via impertinenta buŝo,
ĉe viaj bluaj okuloj,
sur via nazopinto,
sur via amorilo...

hummm..

Ho, amato, karulo,
lasu min danci sur vi.
Mi volas esti via papilio.
Flirti al vi mi volus.
Surflugi vin mi volus.
Sur vi danci mi volus.
Kaj zigzagi sur vi mi volus,
ĝis mi svenus sur vi,
tion mi volus.

Forflugi mi volus.
Kaj reveni mi volus.
Fuĝi denove mi volus.
Ke vi kaptas min, mi volus,
ke vi ĉasas min, tion mi volus!

Vidu al mi, mi revenas jam al vi.
Mi jam dancas sur vi.
Mi jam krias sur vi.
Hura! Amato! Hura!
Nun jam vere sur vi.

Mia amato freneza,
knabo mia, amorulo,
karulo, frenezulo,

volupta knabo.
Mia kara amato.

Kaptu min!
Prenu min!
Vi! Oh!
Ho, vi!

Mi volas esti via papilio.
Lasu min flugi sur vian korpon.
Lasu min danci sur vi.
Ho, dolĉulo, karulo mia,
mia amato freneza.
Lasu min danci sur vi,
sur viaj glataj vangoj,
sur via bela nazo,
sur via dolĉa buŝo,
sur viaj ruĝaj lipoj,
sur via raŭka lango...
sur via langopinto.

Ho jes, ah, jes.
Haaaaa, jes.

Lasu min danci sur vi,
sur via pinta lango,
huuuuummm...
sur via langopinto...
hmhhh, kara...
mi krias, aaaaaaah,
mi krias, hooo, vi!
Bele! Bele!
Jes! Faru!
Hmm,
hummm...

Mi volas esti via papilio.
Vidu, mi dancas sur vi.
Mi tuj mortos sur vi.
Ho, mia amo freneza,
petola knabo, vi dolĉas,
mi tuj mortos, jes...
dolĉe mortos...
sur vi.

Rita Mkrtchyan (Armenio)



Mi ne povas kompreni la homojn,
 Pri la kulpo diskutas, decidas,
 Nur informaj ciferoj por iuj
 Eĉ la agojn kruelajn pravigas.
 Mi ne povas kompreni la vivon,
 Ne kutimas kaj paco, kaj amo,
 La sufero plenigis la marojn
 "Ŝtormas" homa malam' kiel flamo.
 Mi ne povas kompreni la koron
 Ĝi doloras, tagiĝo malhela,
 Ĉies viv' kiel gutoj de sango
 Ploras tero kaj griza ĉielo.

*P.S. Ne gravas pasinteco, la historio ĉiujn juĝos,
 gravas la popolo, kiu ne impetis al milito, al senkulpaj
 mortoj, kiu dum tuta sia ekzisto celis vivi en paco, kun
 paco!*

Siranuish Slagmulder (Francio)



Nacia Libereca milito...

La nigraj nuboj kovris la ĉielon,
 Nokt' anoncis la teruran militon.
 Birdoj timige kriis forflugante,
 Atestis sur Ter' morton alvenontan.
 Pro la frapanta armilo barbara
 Al la lulilo de l'infano dormanta.
 La Morto eniris rikanante forte
 Sendas malfeliĉon nigre vestitan.
 Domoj detruigis, kiel skatoletoj,
 En lernejoj mortis miloj da infanoj,
 Ploreĝis la patrinoj, sed kun kuraĝo
 Prenis la pafilojn kontraŭ malamiko.
 Sur batalkampo fumas la kadavro,
 Bruas nur armiloj en fum' ĉiela spaco.
 Mortas, mortigas... nenion iu komprenas;
 Nur la malamo, jen, kiel birdo flugas...
 Jen la mortanto ion murmuris...
 Li ne volas morti, ĉi juna soldato,

Videblas la vizaĝo de sia patrino
 Kaj ŝatata Monto de Patrolando...
 Armenio mia! Historia Tero,
 Ararat' mia! biblia Montaro
 Staras fiere kunbrakumas valon
 Kie kun bruo fluas ĉarma Araĝso!
 Neniu povus venki nin, Armenojn!
 Neniu kuraĝus okupi nian Sanktan Teron
 Ni ekstaras kontraŭ kruela malamikeco!

05/10/202

Tagiĝo

Vesperas. Jen! videblas la grandioza domeg'
 de la Sun'
 Ĝia pord' jam fermiĝas, misteras la spektro de
 la Lun'.
 La vesper' sekrete rigardas foren por kaŝi la
 tumulton,
 Kaj nur la ĉielo trankvile sekvas la plenstelan
 ekzaltan!
 La steloj diskrete revenas dum alveno de
 nokta temp'
 Volante por montri la vizaĝojn sentime kaj
 kun prudent'!
 L'Aŭroro kun tenero elvekas la rideteman
 Sunon,
 Kune alportante la gefilojn! la Esperon kaj la
 Lumon.
 Tempas! la Klarec' transplantas rideton en la
 kor' de l' flor'
 Reaperas splenda tago kreskigante la bonecon
 en kor'.

18.04.2020

Papos Nascentes (Brazilo)



SUPERNOVA

eksplodas lume
 tutaj partioj
 malaktivaj leĝisdomoj
 sensaĝaj judicaj povoj
 ekzekutitaj ekzekutivaj povoj

ĉio putriĝanta
rekunmetanta humile
en unio

Wally Du Temple (Kanado)



Tradicioj de la Amiŝoj

Mi vekigas en urbeto Amiŝa
Centro de farmkulturado varia
Kie kamparanoj arde bienumas
Virinoj kun ŝtrumpoj nigraj, longaj jupeoj
Viroj kun barboj maturaj, ŝelkoj elastaj
Rezistas kontraŭ influoj modernaj.
Nenia monoagrikulturo monotonas
Kampoj novalas
Porkoj, bovinoj paŝtas ĉe nekulturata
plugter'
Rotacio de rikoltoj kutima afer'
Maizo, milio, luzerno, tritiko
Pennsylvaniaj kampoj jen bunta stebaĵo.
Trarigardante gastejan fenestron
Subite mi aŭdas sonon 'klip klop, klip
klope'
De feraj hufŝuoj ritme sonritme 'klip
klope'
Antaŭ ol mi vidas kaleŝon nigran, ikone
Amiŝan
Dratradioj kirle kaŝitaj pro radrapidec'
Kaj aĝa presbitero per gvidperfektec'
Bridas sian ĉevalon por halti
Kaleŝon kiel aŭto
En traveturebla memserva vojo
Por depreni
Monbiletojn de pagista maŝino
Per plasta
Debitkarto.

Akvopaŝegantoj

Ĉu iu povis scii
Ke iu povus skii
Tutvive sur la Ruĝa Mar'
Ĝis glitis la insekta par'
Sur ondoj surfacsurfantaj

Dorsoj glimas karapacaj.
Kunteniĝa akva haŭto,
Dancteatro de planedo.
Familia glitlascivo.
Sur molekula saltensio



Wel CR (Brazilo)



Makarone

Dum fone la trombono laŭtsonas
vi akordione fanfaronas.
Tutsubite l' trombono fuŝtonas,
vi en laŭbarakto jam ronronas.
(Iom poste)
Silento falas tombe.
La trombon' staras aplombe.
Vi stumblestomble !!!



La Trajno

La relojn de l' rememoro
trajn' iama kun mi pasas
(kuniras mia animo)
Trajn' iama, hodiaŭa,
trajn' al la morgaŭo transen
(vojaĝe la du sen timo!)
La trajno longaĝojiras.
Vivodornoj ne plu ŝiras.
Jam en sonĝo mi ŝekspiras !!!
"Hej" min veke l' anim' diras .

Siv Burell (Svedio)



Jaron post jaro restas la estrar'

Jaron post jaro restas estrar'
reelektita de membroj sen bar'
Membroj kutimas al konata estrar'
certe nur timas mem esti sur la ĉar'

La ĉaro de estraro nestabila estas
misfaro, eraro ?
Sed estraro restas.
Post tempo ŝtoniĝas la vigla movad'
ĉu inspiro troviĝas ĉe juna kread' ?

Sed kie vi estas vi juna dekumul'
ĉu vi vin vestas
por esti herkul' ?
La kulpon por la stat' de nia movad'
mi ĵetas al vi elektintoj en parad'.

Se vi helpus per konsil' pli agrabla estus sent'
per via komputil' vi puŝu al turnvent'
La vent' kaprice blovu inspire al estrar'
kaj iam oni povu labori sen kompar'
kun triumfa mien'
por esperanto,
por politika
aŭ idealisma partio.

Jadranka Miric (Serbio)




Vea revado

Svinganta tiliar'
etendiĝis branĉar'
ĝis la domomuro.
Ombro kiel spuro!
Ruĝas vino en vitra glaso,
surtabligita estas bakita anaso
por via favorata festo.
Antaŭ morna tempesto!

Neniu estas en la domo,
nek sur la fenestro pomo
ruĝas. Nek fontano funkcias pli .
Homo fantoma , kiu speco estas vi ?
Forgeso spurojn viŝas,
pasinteco ne revenas .
Homo pasintecon kaŝas
egoiste. Pri ammemoroj ve, revas!

MULTAJ JAROJ POSTE

Sub nuda tiliobranĉar'
estas benko kun skribita nomar'.
Iuj parolis kore pri anĝelopar',
iuj nomoj estis ĉizitaj . Bona far' .
Iam sidis tie enamiĝintuloj
per kisoj sunon salutintaj,
forte ame brakumintaj.
Vivis pie tiuj delikatuloj.
Forflugis tempo. Restis spuroj.
Ŝanĝiĝis mondo, falis multaj muroj.
Malpermesitan amon neĝo kovris.
Vi benkon purigis, nia anĝeloparo
aperis!
Vi rigardis al blua ĉiel',
mi ,via amara miel'
rigardas vian svingantan manon.
Bonan sanon! Forgesu doloran amon!



Svetlana Konasova (Rusio)



Du hajkoj

friska mateno—
en krizantema floro
kulo dormetas

e krizantemoj

mi ripozas — subita
floraodoro

Mimoza Ahmeti



La frenezulejo kun apertita pordo

Vi foriras, nin forlasas,
“Porĉiame”, pensante
El ĉi tiu tero kiu la via, la nia estas,
Kaj nia frenezulejo tio estas.
Nia kara, raviga frenezulejo,
Kun la ŝirigaj kranioj.

Ho, karaj frenezuloj miaj.
Kiom mi amas vin,
Kvankam neniam mi vin alparolas,
Kvankam neniam vi min alparolas,

Kaj mi apenaŭ vin eltenas
Kaj vi apenaŭ min eltenas.

Sed tio estas rito.
Ni ne vidas unu la alian okulokule,
Ne malamante,
Kaj tio estas ja kialo
Por ĝis freneziĝo interamiĝante,
Delire ridetante,
Dum sur la facoj
La larmoj fluas
La larmoj.
Miaj kunsuferantoj,
Elmigrece forirantoj,
Disde nia unika frenezulejo,
Kun la fiksitaj anguloj
Post unu sola ideo,
Ho, nur post unu sola ideo,
Kiu neniam vidiĝis, nenie troviĝis
Kaj mi ne scias ĉu iufoje estos trovata.
Disiru, foriru, malaperu,
Landlanden kaj ŝtatŝtaten....
Ho, kia kriego krias
El la nia frenezulejo

En la malfrua horo de la krepusko,
Kiam li sopiras pri la filoj en Okcidento...
Kia tristeco!
Senhaŭtigigitaj muroj..Muroj kiuj ĉiam
Limigas la horizonton
Por lasi supre senfinan ĉielon.

Tie, post la noktomezo la singultoj finiĝas,
Kelkiu al si parolas:
Tamen al la albano
Kie ajn li troviĝas
Sia frenezeco ja sufiĉas..

Elalbanigis



Bardhyl Senimi
(Albanio)

El Ĉina Antikva Poezio

Su Shi (1037-1101)

Aŭtunmezo

—laŭ melodio *Ĉarma kantistino*

Sur altaĵo mi rigardas:
vasta kaj sennuba la ĉielo
etendiĝas ĝis senlimo;
lun’ alflugas en malvarma helo
kaj disverŝas lumon, kiu
mergas la ĉielon kun lazura belo
en aeron fridan;
la palac’ el jado en lunfabelo
ja aspektas ĉarme kaj impone;
la feinoj ir-reiras en etero
al la luno freŝa kaj glacia
rajde per feniksoj kun libero;
tra la fumnebuloj arboj jen vizias
inter pitoreskaj monto kaj rivero.

Mi kunfrapas manojn fole
kaj kantadas en ebri’.
Mi, la ombro kaj l’ luno

kune ĝuas tempon en orgi'.
 Ni trioje dancas en rosduŝo
 kaj zefiro kun ĝojkri',
 forgesante la tempopason.
 Mi ja volus per magi'
 rajdi al la lun' per vento,
 jen anstataŭ per giganta cikoni'.
 En kristala lunpalaco flutojn
 oni ludas jam per melodi'.

Mi vizitis Templon Qingquan

*Mi vizitis Templon Qingquan de Qishui, proksime
 al roĝo Lanxi, kiu fluas okcidenten.*

—laŭ melodio *Silk-lava roĝo*

Submonte ŝosoj de eŭporioj
 trempigas en rojflu'.
 La pado sabla inter pinoj
 jen puras sen kotglu'.
 En nebulpluv' kukoloj
 kukuas kun laŭtbru'.

Kiu asertas, ke juneco
 revenos jam ne plu?
 La roĝo Lanxi eĉ inverse
 ja okcidenten fluas, ĉu?
 Ne plendu pri rapida tempopaso,
 ni blankharuloj en enu'!

***Adiaŭado al amiko,
 kiu reiras al hejmloko***

—laŭ melodio *Verdjada taso*

Dum tri jaroj mi eĉ sonĝas
 pri l' revena vojo tag' post tago.
 Leterhundon mi forsendas
 kune kun vi en reira vago.
 Ĉe pramejo ne alvoku l' boaton
 laŭte, por ne ekpaniki per krud-ago
 amobirdojn kaj ardeojn.
 Tieaj kvar pontoj en zigzago
 estas lokoj, kiujn mi tre ŝatis
 iri laŭ rutina trako.

Spektu vidindaĵojn tiulokajn
 en printemp' malfrua,

kiuj ja similas al pentraĵo
 el la fama mano kontribua.
 Ofte ĉantu versojn de poetoj
 famaj kun apetito ĝua.
 Jen revenu je la dato difinita
 de imperiestro sen prokrasto plua.
 La printempa vesto sur vi
 fare de mia amatino iam
 malsekiĝis de larmpluv' alglua.

Vortoj pri la printempo

—laŭ melodio *Mallongigita melodio magnolia*

Kulti kotajn bovon kaj plugilon,
 laŭ l' kapolabora tradicio,
 ja heroldas la printempan okupiĝon
 pri semad', plugad' sub bona aŭspicio.
 Jam de l' maro blovas vento
 longedaŭre sen vario.
 La printempa mano lerte,
 majstre farbas kun pasio
 persikruĝon karn-kolore.

Per verdflagoj kult-ceremonio
 jen ornamas kampojn primaverajn.
 Min alblov' sobrigas el ebrio
 pro drinkado de alkoholaĵo.
 Ne simile al la kaba dimensio,
 salikflokoj flirtas jen ĉi tie,
 kiel neĝo ŝvebas de magio.

Elĉinigis



Vejdo (Ĉinio)

Chen Tao (812 - 885)

Melodio Longxixing

Ekstermi hunojn ili ĵuris spite sian vivon,
 kvin mil soldatoj bontrejnitaj mortis bataleje.
 Veindas la skeletoj ĉe l' rivero Necerteco—
 ankoraŭ l' junedzinoj sonĝas pri la kara pleje.

Quan Deyu (759 - 818)

Sopiro al amo

Hieraŭ nokte loziĝis jupzono;
araneeto ĉi-matene flugas.

Ĉu tio signas revenon de l' edzo? –

Al ŝminko haste mi min alkondukas.

**Antikvaj ĉinoj kredis pri la superstiĉo: kiam jupa zono mem loziĝas, aŭ kiam araneeto ekflugas, tio aŭguras ian feliĉon baldaŭ okazonta.*

Liu Shenxu (? - ?)

Sen titolo

Perdiĝas inter blankajn nubojn vojo,
printempo longas kiel verda roĵo.
fojfoje floroj falas, kaj de foro
alŝvebas el akvfluo bonodoro.

Kvieta pord' vizaĝas al aleo;
en salikaro sidas ĉi studejo.

Dum la sunlum' tra branĉoj glimas,
sur mian veston sin helbril' pavimas.

Elĉinigis



Minosun (Ĉinio)



Zhuangzi

ĈAPITRO DUDEK-TRIA

Gengsang Chu

§23-02

Nanrong Chu side rektigis sin sur sia
postaĵo kun konfuzita mieno, dirante:

“En mia aĝo jam sufiĉe granda, kiel do
mi lernu de vi, por atingi vian idealan staton?”

La majstro Gengsang lin respondis:

“Tenu vian korpon bonstata, konservu
vian naturon, ne trostreĉu vian menson, kaj vi
atingos mian staton en tri jaroj.”

“Mi ne scias, kiel la okuloj estas
diferencaj unu de la alia en formo,” ree
demandis Nanrong Chu, “sed la blindulo ne
povas vidi per siaj okuloj. Mi ne scias, kiel la
oreloj estas diferencaj unu de la alia en formo,
sed la surdulo ne povas aŭdi per siaj oreloj. Mi
ne scias, kiel la mensoj estas diferencaj unu de
la alia en konstituo, sed la frenezulo ne povas
ĝuste pensi per sia menso. Mi havas la saman
formon kiel vi, sed ŝajnas, ke inter ni devas
esti diferenco, ĉar ni apenaŭ povas egale pensi.
Kiam vi diris: ‘Tenu vian korpon bonstata,
konservu vian naturon, ne trostreĉu vian
menson, kaj vi atingos mian staton en tri jaroj’,
mi penis kompreni viajn vortojn, tamen ili
eniris en miajn orelojn nur kiel bruoj, kies
sencon mi ne kaptis.”

“Mi jam diris ĉion, kion mi povas diri,”
diris la majstro Gengsang. “Oni diras, ke la
malgranda vespo ne povas elkovi grandan
raŭpon, kaj la malgranda kokino el la regno
Yue ne povas kovi cignan ovon, sed la granda
kokino el la regno Lu tion povas. La kokinoj
estas dotitaj per la sama kovkapablo. Iu el ili
povas kovi tian ovon, dum la alia tion ne
povas, ĉar la grandeco de iliaj kapabloj estas
diferencaj inter si. Mi ne povas lumigi al vi
tiun ĉi temon, ĉar mia kapablo estas
malgranda. Kial do vi ne iras suden por viziti
Laŭzi?”

Kun sufiĉa provizaĵo por la vojo Nanrong
Chu marŝis sep tagojn kaj noktojn kaj fine
atingis la lokon, kie Laŭzi vivis.

“Ĉu vi venas de Gengsang Chu?”
demandis Laŭzi.

“Jes,” respondis Nanrong Chu.

“Kial vi venas kun tiom da homoj?”
demandis Laŭzi.

Nanrong Chu time ĵetis rigardon posten.

“Ĉu vi ne komprenas miajn vortojn?”
demandis Laŭzi.

Nanrong Chu honte mallevis la kapon kaj poste, levinte la kapon al la ĉielo, profunde eksuspiris.

“Mi nun forgesis, kiel mi devus respondi, kaj pro tio mi forgesis ankaŭ mian metotan demandon,” diris Nanrong Chu.

“Kion do vi volas diri?” diris Laŭzi.

“Se mi estas en nesciado, tiam oni diros, ke mi estas stulta; se mi estas en sciado, mi kaŭzos al mi zorgojn; se mi ne sekvas la humanecon, mi malutilos al aliaj; se mi sekvas la humanecon, mi malutilos al mi mem; se mi ne sekvas la justecon, mi ofendos aliajn; se mi sekvas la justecon, mi ofendos min mem. Kiel mi povos eltiri min el tiuj ĉi tri dilemoj, kiuj min turmentas? Mi esperas, ke vi bonvole helpas al mi eliĝi el ili pro la rekomendo de mia majstro Gengsang Chu.”

“Kiam mi ĵus direktis mian rigardon en viajn okulojn,” diris Laŭzi, “mi eksciis, kio vin konfuzas en la menso. Viaj paroloj plu konfirmis mian opinion. Vi estas en tia konfuzo, ke vi aspektas kiel infano, kiu, perdinte siajn gepatrojn, provas trovi ilin per stango en la maro. Vi estas kiel senhejmulo, tute vojerarinta. Vi deziras reakiri vian denaskan naturon, sed vi ne scias, kion fari. Kia kompatinda homo vi estas!”

Nanrong Chu petis permeson resti kun Laŭzi kelkan tempon, por ke li povu kulturi en si tion, kio estas bona, kaj senigi sin je tio, kio estas malbona. Post dek tagoj, sentante tian sinkulturadon tre malfacila, li malgaja ree iris al Laŭzi.

“Nun ke vi penas purigi vian menson, kial vi ankoraŭ estas tiel malgaja? Tio signifas, ke vi ankoraŭ retenas en la menso iajn malbonajn ideojn. Kiam via maltrankvileco ne povas esti regata de ekstere, vi devas bridi ĝin de ekstere; kiam via maltrankvileco ne povas esti regata de interne, vi devas bridi ĝin de interne. Kiam via maltrankvileco ne povas esti regata kiel de interne tiel ankaŭ de ekstere, tiam eĉ tiuj, kiuj atingis la Taŭon kaj posedas

la virton, apenaŭ povas sin regi, por ne paroli pri vi, kiu ĵus komencis lerni la Taŭon!”

“Supozu, ke vilaĝano falis en malsanon kaj lia najbaro venas lin vidi,” diris Nanrong Chu. “Se la malsanulo povas rakonti, kio okazis al li, kaj diras, ke li estas malsana, tio montras, ke li ne grave malsanas. Ĉiufoje, kiam mi aŭdas ion pri la Taŭo, mi estas kvazaŭ tiu, kiu pli grave malsaniĝas post kiam li prenas la medikamenton. Tial mi volus aŭdi de vi nur pri la maniero bone konservi la vivon.”

“Koncerne la manieron bone konservi la vivon,” diris Laŭzi, “vi nur demandu al vi ĉi tiujn demandojn: Ĉu vi povas resti pura kaj simpla? Ĉu vi povas konservi vian denaskan naturon? Ĉu vi povas antaŭdiri vian sorton sen aŭgurado? Ĉu vi povas scii kie halti? Ĉu vi scias kiom estas sufiĉe? Ĉu vi povas peti ion de vi mem anstataŭ de aliaj? Ĉu vi povas esti libera de zorgoj kaj maltrankvilo? Ĉu vi povas esti naiva kaj senscia? Ĉu vi povas kondukti kiel novenaskito? La novenaskita infano povas ploradi tuttage sen perdi sian voĉon, ĉar ĝi estas en la perfekta harmonio de la konstitucio. Ĝi povas pugnigi la manojn tuttage sen konvulsiĝo, ĉar ĝi estas en la perfekteco de sia naturo. Ĝi povas fikse rigardadi tuttage sen turni siajn okulojn, ĉar ĝi estas en la perfekteco de sia mensokoncentriĝo. Ĝi paŝas sen scii kien iri kaj haltas sen scii kion fari. Jen la maniero bone konservi la vivon.”

“Ĉu tio do estas la virto de la perfekta homo?” demandis Nanrong Chu.

“Ne,” respondis Laŭzi. “Tio estas nur la maniero aktivigi la menson ĝuste kiel degeligo aŭ fando de glacio. Ĉu tio povus esti egala al la virto de la perfekta homo? Por konformigi sin al la naturo, la perfektaj homoj dividas la nutraĵon kun la tero kaj dividas la ĝojon kun la ĉielo. Ili ne implikiĝas en komplikajn homajn interrilatojn, nek riproĉas unu la alian, nek intrigas unu kontraŭ la alia, nek kunlaboras unu kun la alia. Ili foriras sen maltrankvilo kaj venas sen zorgoj. Jen la maniero bone

konservi la vivon.”

“Ĉu tio do estas la plej perfekta stato?”

“Ankoraŭ ne,” diris Laŭzi. “Ĵus mi demandis vin: ‘Ĉu vi povus kondukti kiel novenaskito?’ La novenaskita infano moviĝas sen scii kion fari kaj paŝas sen scii kien iri. Ĝia fizika formo estas kiel sekiĝinta arbo kaj ĝia koro estas kiel malvarma cindro, sekve al ĝi venas nek malfeliĉo, nek feliĉo. Kiam ekzistas nek la malfeliĉo, nek la feliĉo, kiel do oni povas suferi afliktojn kaŭzitajn de homoj?”

Elĉinigis



Wang Chongfang

(Ĉinio)

Ĉineske

Jadranka Miric (Serbio)

Serĉi konsolon

—laŭ ĉinesko Sopir-al-sudo*

Mezaĝa
paro. Silento
inter ili doloras.
Ve, larmoj en torento.
Divorc’ — fisento .

En okul’
via svelta siluet’.
En la malpena ĉambro
nia danco “manuet”’.
Ve, nia duet’.

Malnova
pordo fermiĝis.
Preferas vi la novan.
Doloro plilongiĝis.
La am’perdiĝis.

Rikolto
riĉa aŭtuna.
Nia mala, malpura.
Ŝia ag’ oportuna.
Dank’ al mi juna.

Animo
disŝirita.Ve.
Melankolio regas.
Ofte vagas Lun’ kun mi.
Gaja estu vi!

Laŭspuroj de iama familia domo

—laŭ ĉinesko Sopir-al-sudo*

Muzikon
de la naturo
ĉu vi iam aŭskultis?
Jen, mia aventuro.
Kri’ de naturo!

Decido
longe farita.
Mi vizitos bienon
de avin’ heredita.
Sur altaĵo trovita!
.
Transe de
river’ Timoko,
fore de riverbordo.
Al mi okazis ŝoko.
Mizeras loko.

Ruino
anstataŭ domo.
Arbusto kaj ilekso!
Nek florbedoj nek homo.
Nek bestodomo!

Kun tero
superŝarĝita
iu traktoro foris.
Vinberejo manĝita.
Anim’ streĉita!

Aŭtuna tago

Krepusko.
Luno tra stelar'.
Ruĝiĝis ĉiel'. Flugis
alten kun krioj birdar'.
Jen, vagas sturnar'.

Odoras
tero je pluvo.
Aŭdiĝas tondro ie.
Grundo kvazaŭ bankuvo.
pluva fipruvo.

Sub ombrel'
paro brakumita .
Man- en-mane ŝvitanta
pro pasio ŝvelita
ame ligita.

Ĉirkaŭe
ŝvebanta flava
disĵetita foliar'.
Kliniĝas al arb' brava.
Jen, bildo rava.

Blankiĝas
bird'. Mi vidis ĝin.
Unusola kolombin'
kun idar' en sia sin'.
Mira bird-destin'.

Ankoraŭ Aŭtuno someras

Lazuras
ĉiel' senfina.
Varmo milde karesas
nin. Tiklas odor' pina.
Natur' diina!

Agrabla
promeno. Homoj
malkovras naturbelon
en renaskiĝo. Amoj
tra florsezonoj!

Vespero
kvazaŭ limarko
venis frue kaj nuda.
Sur via dorso sako
lia lanjako!

Vetero
ofte trompema
kaŭzis malsanojn. Tial
nek estu hezitema
nek suspektema!

Malfrua
aŭtun' brilas kaj kore
nin salutas. Ni festu
venontan vintron kore ,
anime glorie!

**Sopir-al-sudo: ĉina fiksforma poemo el kvin versoj
de 35,77,5 silaboj laŭ rimaranĝo xa,xa,a (x=senrima).*

Papos Nascentes (Brazilo)

VENĜO

Li maĉis. Kaj maĉis. Oni ne scias, kion li tiom
interdente pistis. Maĉ-gumo ne. Pro naŭzo, li diradis.
Mem-riproĉoj, klaĉaĵoj, eble. Ĉu la kolero pro la
englutita fivorto? Ĉu la ne vomita sakrado? Ĉu la
remuelado de la vivo – “malmola kiel ŝtalo”?

Mordis li la langon. Tiom da sango! Preskaŭ
manke li mortis.

MI VOLAS AVINJON!!!

En la tempo de Avinjo, la kuraco de frenezeco
estis... pastro. Venis la pastro. La kuraco, kelkfoje.
Hodiaŭ estas multa frenezeco premiata: posteno en
publika povo, estrado, prestiĝo. Diri kion oni volas
fordonas prestiĝon, fidelajn sekvantojn. Agordo
naskas admiron kaj voĉdonojn. Pri frenezeco tamen
mi iom scias pri la mia, eĉ se preskaŭ nula estas la
barilo de la najbaro. Frenezo-portas-frenezon, iĝas
torturo, rompiĝas la delikata haŭto de la realo. Multaj
frenezuloj, la aliaj, malmultaj. La demokratiigo de la
frenezeco, fakto: novaĵoj instigas, propagando
promesas, profesio plenumiĝas.

